


# **Vischnaunca da Medel/Lucmagn**



**Reglament da traffic  
per la vischnaunca da Medel/Lucmagn**

## **I. Vias d'ual**

---

Sebasond sin art. 15 dalla lescha d'ual federala, art. 20 dalla lescha d'ual cantunala ed art. 16 dall'ordinaziun tier la lescha d'ual cantunala relai la vischnaunca da Medel/Lucmagn las suandontas prescripziuns per il diever dallas vias d'ual.

### **Art. 1 Vias d'ual cun scamond da carrar**

<sup>1</sup>Sin las sequentas vias d'ual vala in scamond da carrar cun vehichels a motor (signal 2.13) cun excepziuns tenor art. 4 e 5.

- Canduglias - Glierauns
- Glierauns - Crap Stagias
- La Greppa - Perdatsch
- Clavasuras - Fontauna Rodunda
- Stagias - Salaplauna
- Stagias - Uaul da Crestas
- Stagias - Cavorgia
- Fuorns - Fontauna

<sup>2</sup>Sin las suranumnadas vias valan las suandontas restricziuns:

- |                    |              |
|--------------------|--------------|
| - peisa maximala   | 20.00 tonnas |
| - ladezia maximala | 2.50 meters  |

## **II. Vias da funs e d'alp**

---

Sebasond sin art. 3 LTV (lescha da traffic sin via) sco era sin art. 7, 10, 13 OE tier LTV (ordinaziun executiva tier la lescha da traffic sin via) relai la vischnaunca las suandontas prescripziuns per il diever da vias da funs, vias d'alp ed autras vias.

### **Art. 2 Vias cun funcziun da colligiazion senza scamond da carrar**

<sup>1</sup>Las sequentas vias han la funcziun da vias da colligiazion ed ein accessiblas al traffic da vehichels a motor:

- Curaglia - Soliva
- Curaglia - Canduglias
- Plaun Curaglia - Punt Romana
- Fadretsch - Urlatsch
- Fadretsch - Zona da mistregn - Islas
- Mutschnengia - Cuntera

- Val da Crusch - Baselgia
- Platta - Drual - Matergia
- Fuorns - Acla - Punt

<sup>2</sup>Sin las suranumnadas vias valan las suandontas restricziuns:

- peisa maximala sin vias senza signalisaziun 20.00 tonnas
- ladezia maximala 2.50 meters

### **Art. 3 Vias da funs e d'alp cun scamond da carrar**

<sup>1</sup>Sin tut las ulteriuras vias da funs e d'alp vala in scamond da carrar cun vehichels a motor.

<sup>2</sup>Excepziuns ein prescretas egl art. 4 e 5.

<sup>3</sup>Sin las suranumnadas vias valan las suandontas restricziuns:

- peisa maximala tenor signalisaziun
- peisa maximala 20.00 tonnas
- ladezia maximala 2.50 meters

## **III. Dretgs da carrar / Taxes**

---

### **Art. 4 Dretg da carrar senza carta da legitimaziun**

Negina lubientscha basegna ei per:

- a) tuts viadis da survetsch dalla polizia, dil survetsch forestal, per diever agricol e forestal (maschinas agricolas, motociclettas tochen 50 cm<sup>3</sup>, senza autos), dalla polizia da catscha e pesca, dalla sanitad, dils pumpiers, dils guardians d'ieli e da chemia, viadis per ademplir activitads officialas u legalas (p.ex. inspecziuns dalla cumissiun da fiug, dertgiras per uatgas, etc.) sco era viadis en survetsch dil cantun e dalla confederaziun,
- b) viadis da miedis e veterinaris en activitad professiunala sco era per viadis da fructificaziun artificiala per biestga,
- c) viadis che vegnan ordinai d'in post cumpetent a caschun d'accidents, d'incendis e da catastofas,
- d) viadis pil transport da selvaschinas da grefla sittadas.

## **Art. 5 Dretg da carrar cun carta da legitimaziun**

### *a) Diever agricol*

<sup>1</sup>Per il diever agricol sto il pur retrer dalla canzlia communal ina carta per igl auto. Tuttas vias ch'el basegna da far diever vegnan nudadas sin la carta. El paga ina taxa administrativa per la carta.

### *b) Ulteriur diever*

<sup>2</sup>La suprastonza communal dat sin damonda lubientschas da carrar:

- a) per vehichels da proprietaris da beins immobiliars e d'affittaders per igl access a lur schischom,
- b) per vehichels da furniturs, da glied da professiun, da guardiacamonas, da concessiunaris, etc. per praticar lur activitad,
- c) per far visetas a pasturs, per gidar da far fein, etc.,
- d) per vehichels e transports da persunas impedidas dad ir a pei.

<sup>3</sup>Scadina lubientscha tenor al. 2 vala mintgamai mo per ina via numnada en art. 1 e 3.

## **Art. 6 Taxas administrativas**

<sup>1</sup>Sebasond sin art. 68 dalla constituziun communal dalla vischnaunca da Medel/Lucmagn vegn incassau per cartas da legitimaziun tenor art. 5 las suandontas taxas administrativas:

### *a) Diever agricol*

- carta per in onn tenor art. 5 al. 1 fr. 50.—
- cartas supplementaras fr. 10.—

### *b) Ulteriur diever*

- carta per in onn tenor art. 5 al. 2 fr. 50.—
- cartas supplementaras fr. 10.—
- carta per in meins fr. 20.—
- carta da treis dis fr. 10.—

c) vehichels a duas rodas pagan la mesadad, vehichels sur 3.5 t pagan il dubel da questas tariffas.

<sup>2</sup>La carta da treis dis vala naven dil datum d'emissiun maximalmein treis dis.

<sup>3</sup>Las cartas pil diever agricol sco era per igl ulteriur diever vegnan dadas dalla administraziun communal.

<sup>4</sup>La lubientscha annuala cumpeglia ina carta per in onn. La carta per in onn vala per maximalmein in vehichel da quater rodas ni in vehichel da duas rodas.

<sup>5</sup>La carta ei da plazzar vid il vehichel aschia che las indicaziuns ein bein veseivlas. La lubientscha ei buca transferibla.

## **Art. 7            Ulteriuras restricziuns**

La suprastonza communal sa relaschar ulteriuras restricziuns per il diever da vias e punts. La publicaziun ed eventualas signalisaziuns necessarias per talas restricziuns succedan tenor art. 8.

## **IV.                Determinaziuns generalas**

---

### **Art. 8            Prescripziuns specialas**

<sup>1</sup>En cass da relaziuns disfavoreivlas sa la suprastonza communal serrar tuttas vias u relaschar restricziuns per in cert temps e/u per certas categorias da vehichels.

<sup>2</sup>Dil territori cunfinont allas vias astga ei buca vegnir fatg diever cun vehichels. Parcar e cruschar astga succeder sulettamein en loghens previ ed adattai persuerter.

### **Art. 9            Ordinaziun executiva**

La suprastonza communal ei autorisada da relaschar in'ordinaziun executiva tier quei reglament davart il traffic.

### **Art. 10          Disposiziuns penalas**

<sup>1</sup>Surpassaments da quest reglament vegnan castigai dalla suprastonza communal cun ina multa da tochen fr. 1'000.--, en cass da repetiziun tochen fr. 5'000.--.

<sup>2</sup>Il surdiever dalla lubientscha sa haver per consequenza la privaziun permanenta u temporara da tala.

<sup>3</sup>Encunter castitgs relaschai dils organs da controlla sa vegnir fatg protesta enteifer 10 dis naven dil datum dil castitg (bul postal) tier la suprastonza communal cun indicar il motiv dil surpassament.

<sup>4</sup>Dat la suprastonza buca suatientscha alla protesta sa vegnir recurii enteifer 30 dis naven dil datum dalla risposta (bul postal) tier la Dertgira administrativa dil cantun Grischun.

## **Art. 11            Execuziun**

L'execuziun da quest reglament ei caussa dalla suprastonza communal. Ella sa delegar quella cumpetenz a als funcziunaris communal sco era ad ulteriuras persunas cun incarica speciala.

## **Art. 12            Publicaziun e signalisaziun**

Las excepziuns e restricziuns da traffic ch'ei vegnidas relaschadas cun quei reglament ei da publicar. La signalisaziun ha da succeder en cunvegnientscha cun la polizia cantunala da traffic.

## **V.                    Determinaziuns finalas**

---

### **Art. 13            Abrogaziun**

Quest reglament remplazza il reglament per far diever dallas vias d'uaul cun vehichels a motor dalla vischnaunca da Medel/Lucmagn dils 23 da matg 1997.

### **Art. 14            Approbaziun e vigur**

<sup>1</sup>Quest reglament ei vegnius approbaus dil pievel alla radunonza communal dils 26 d'avrel 2007.

<sup>2</sup>El va en vigur suenter l'approbaziun dils signals da prescripziun tras il Departament da giustia, polizia e sanita e suenter che las corrispundentas signalisaziuns ei vegnidas plazzadas el liug (art. 13, al. 2, ordinaziun executiva dil cussegl grond tier la lescha davart il traffic sin via).

Il president communal:

Il canzlist communal:

Claudio Simonet

Valentin Pally